

E storia di scol MAN NA CABES

Un biaha tawa'tin den un pais chikito un scol cu tawata yama Man na Cabes. E tawata un scol cu 26 alumno: mucha A te cu mucha Z. Cabesante di e scol tawata Mener Manduro. Y e demas personal: Yufrou Grito, Mener Sol, Yufrou A. Patica y Mener B. Oca. Mener Manduro a yama un reunion cu riba agenda un solo punto: papel pa traha strafwerk ariba a caba y no tin mas sen pa cumpra nobo pa e aña escolar aki. Ata aki parti di e reunion. **Mener Sol:** "Coleganan, segun mi nos ta riba mal caminda cu dunamento di tanto straf asina. Cos ta bai de mal en peor."

Yufrou Grito: "Abo por papia facilmente. Segun mi bo ta djis sera bo wowo pa no mira tur e maldad cu e muchanan ta hasi."

Mener B. Oca: "Mi ta bisa for di masha dia. Spar e blachinan di strafwerk pa nan no caba. Wak ami: Kico bo a kere cu mi a hasi ora mi a haya mucha F ta bebe djus di mucha C? Mi a lague un siman largo sin bebe awa."

Mener Sol: "Hesus! Colega! Por ta cu mucha F no a come ni bebe e dia ei." **Yufrou Grito:** "Ami si ta haya skirbi e miho straf cu tin. Bo no tin nodo di sinta pensa ki straf pa duna. Djis pensa cuanto blachi y cla."

Mener Manduro: "Mener B. Oca y Yufrou Grito, boso tur dos tin un tiki rason. Tin oraemun tek tambe sa yuda. Si, si, Mener sol, mi sa caba cu ley no ta permiti esey. Y abo, Yufrou, A. Patica, kico bo ta pensa?"

Yufrou A. Patica: "P'ami no ta importa. By the way, mi no tin mucho tempo pa e cos aki. Cuarto pa tres mi mester bai."

Mener Sol: "Ami ta kere cu nos ta mucho intolerante cu e muchanan. Nos mester siña observa nos mes y nos muchanan mas miho. Talbes papia cu e mayornan tambe."

Mener B. Oca: "No! No! No! Laga mayornan afo!"

Mener Manduro: "E mayornan no ta miho. Kere mi. Mane' c'e muchanan ta, asina e mayornan tambe ta. Un set di problema."

Tuma mucha K, cu su tata ta den prison."

Yufrou Grito: "Si! Un bon ehempel. Traha un dia cu ne anto bo ta componde dicon su tata ta den prison. Insoportabel e mucha ta. E ta come rasenchi den klas, bebe awa scondi, tenta mucha henter dia, asta yama mi yufrou Grita-pa-loco."

Mener Sol: "Pero bon mira, mi no a tende bo menshona nada grave cu el a hasi."

Yufrou Grito: "An, no? Ta pesei e muchanan t'asina, no! Mener mes no ta haya e cosnan ei nada grave. Laga mi bisa bo, no. Mita di tur e blachinan di straf a wordo gasta na mucha K. E ta daña pa tur."

Mener B. Oca: "Y mucha P y C y A awor! Miho nan keda cas of bai un otro scol. Nan no ta siña nada tog. Tempo so mi ta perde cu nan."

Mener Manduro: "Bueno. Ban busca un solushon pa nos problema. Ken tin sugerencia?"

Mener Sol: "E solushon ta simpel. Papel a caba, el a caba. No ta duna strafwerk mas."

Yufrou Grito: "Imposibel! Ami ta kere cu nos mester pidi e mayornan contribui cu algo of laga nan tene un bake-sale pa nos haya fondo."

Mener B. Oca: "Ami ta kere cu nos mester busca ayudo di afo pa nos problema, miho bisa, problema di e muchanan. Mi a lesa algo masha interesante den un revista di afo. Ta trata di un experimento. Nan ta hasi algo cu lo calma e muchanan y pone nan comporta nan mes manera cu bo pidi nan y ademas nan lo bira mas inteligente. Nan mester di hende em mucha pa experimenta. Y nan ta hasie pornada."

Yufrou Grito: "Net loke nos mester."

Mener Sol: "E cos ei no por ta sano. E ta zona peligroso."

Mener B. Oca: "No, no. No tin ningun peliger. Ta tres profesor tin e guia den e cos aki. Nan sa kico nan ta hasi."

Mener Manduro: "Interesante. Hopi interesante. Laga nos vota. Si mayoria ta pro, nos ta duna Mener B. Oca man liber pa actua."

Yufrou Grito: "Ami ta pro. Kico na mundo y cu por hasi un mucha obediente y ehemplar, ta bon pa mi. Y si riba dje e bira mas sabi, ta miho ainda. Ami ta pro."

Mener Sol: "Ami si ta contra. Mi no ta confia cosnan asina."

Mener Manduro: "Un pro, un contra. Ami tambe ta pro. Y abo Yufrou A Patica? Yufrou A. Patica!"

Yufrou A. Patica: "Ai, dispensa. Ta mi oloshi mi ta wak pa sa cuanto minut falta. Ponemi pro numa. Mi mester bai tambe."

Mener Manduro: "Mi ta supone cu Yufrou A. Patica tin un asunto masha

importante pa atende."

Yufrou A. Patica: "Si. Mi manicurista ta den yega mi cas. Mi a lubida cu nos a palabra un reunion di scol awe. Semper tawata un bes pa aña, ta awor a bira dos. Pero esaki no ta ora paga tog, no!"

Asina a sosode cu Mener B. Oca por a actua. El a hasi su conekshonnan y denter di un siman a yega un mener di Instituto di Manipulashon Electronico na e scol. Den un cuarto chikito sera e shon a tuma e muchanan un pa un pa un tratamiento. Loke el a hasi, ningun hende no por bisa cu seguridad. Unico cos el a splica ta, cu ta trata di un chip minusculo, asina chikito, cu e mucha no ta sinti mes ora e wordo hinca den su cabes.

E cambio tawata increible! Mucha A te cu Mucha Z tawata actua exactamente manera nan maestra of maestro tawata spera di nan. Esta orguyoso Mener Manduro tawata di su scol. Asta el a lanta un comishon pa cambia number di e scol den "SCOL PERPEKSHON". Miho number no tawata existi. Y Yufrou Grito tampoco no por a caba di gaba e muchanan. Porfin, despues di diesshete aña, e por a traha na su smak. E unico cu tawata man na cabes, tabata Mener Sol.

"E cos aki no ta bon," el a bisa e otro nan. "E muchanan no ta hari, ni yora, ni rabia, ni pleita sikiera."

"Straf bo tin gana di parti atrobe?" **Mener B. Oca** puntr'e tur rabia.

Pa mustra henter e pais con bon su scol tawata, Mener Manduro, yen di fanfara, a invita Rei Practico pa bishita e scol. Y berdad! E scol a causa un furor. Rey Practico por a observa con dosil e muchanan tawata. Apenas yufrou of mener bisa algo, ya tur tawata cla pa cumpli cu nan tarea. Y Rei Practico por a observa tambe cu e muchanan no tawata tin mester di splicashon di nada. Tur cos nan tawata sa di mes. Tur cos nan tawata por, anto perfectamente.

Cabesante Manduro a spera un bon aumento di salario pa su mes y kisas pa e otro nan tambe. Un baño friu el a haya, ora cu un par di dia despues un mensahero di rei a trese e siguiente notisia:

Rei Practico a yega na e conclushon cu su pais chikito no tin sen pa gasta na cosnan innecesario. Mirando e perfekshon di di Mucha A te cu Mucha Z, a disidi di sera e scol, cu a bira un luho pa e pais. E muchanan por drenta armada inmediatamente sin pasa ningun test.

Fuera di desespera e cabesante y su personal a keda tur babuca, menos Mener Sol.

E. Ruiz-Croes